



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Christopher Luxon-i New Zealand PM election kokogo

Cristiano Ronaldo Forbes' List nung sen timtiba aaba football asayar kumogo



VOL. XXI NO. 08 (ADOK 08) DIMAPUR

AMUNGNÜ (SUNDAY)

MONGPUTENI (OCTOBER) 15, 2023

₹ 5.00

Dr. Mansukh L Mandaviya-i Nagaland nung mezüngbuba medical college lapoktsüogo

Kohima, October 14, 2023 (DIPR): H&FW, and Chemicals & Fertilizers Union Minister Dr. Mansukh-i October 14, 2023 nü Nagaland Institute of Medical Sciences and Research (NIMSR) lapoktsüogo.

“Nagaland renloka aotsü lenmang sadema lir aser state sasep nung rongsen peria dang lir. Prime Minister Modi-i North East region aser talisa healthcare sector renloktsü atema temlung agütsür. Iba atema PM Modi-i Red Fort nungi Panch Pran tenangzükba agiogo” ta Dr. Mansukh-i ashi.

Mapang tatsüka tsüingda linük nung MBBS menden anasü agi teimba kumogo aser iba ya Centre sorkari healthcare education aser services ulushitsü nangzükba ama inyakba lir ta pai ashi.

“NIMSR ya medical college ka dang masü saka research institute ka lir. Iba reju ajanga medical education sayuba dang masü saka Naga nung dak temang nung timtem puteta anepalutsü” ta Dr. Mandaviya-isa ashi.

Hornbill Festival indang olen ka ashidang Nagaland nung sobaliba repringdangtsü yongyar aser par kibong den külemi Nagaland semdangi arutsü tebilemba lir ta paisa ashi.



October 14, 2023 nü Union Minister Dr. Mansukh-i Nagaland Institute of Medical Sciences and Research (NIMSR) lapoktsüdang agiba noksa ka angur. (Kohima, October 14)

“Prime Minister Modi-i medical sector ya alima jenjang nung kümdaktsünür. Iba jagi Assam Medical Colleges nung Japanese oshi indang course tenzükogo aser iba mesükba course Nagaland nunga tenzüksü sentong lir” ta paisa shisem.

“India nung healthcare ya shishilembaba maparen ka masü tangar yariba service ka lir. COVID-19 wara nung tanga linüktem nem Hydroxychloroquine agütsüba ajanga India-i humanitarian service tenangzükba kuli sayuogo. India-isa nisung ajaki

alia chitetsüsa jenjang dalang agi mozü yanglua ayoker” ta Dr. Mandaviya-isa metetdaksü.

Nagaland nung medical tourism inyaksü lenmang sadema lir aser iba ajanga nisungtemi alima tobur ajung repringba den külemi temang anepalutetsü akok ta paisa ashi.

Chief Minister Neiphiu Rio-i Prime Minister Modi dang Nagaland nung infrastructure projects inyakba atema pelaba metetdaksü.

“Nagaland nung mezüngbuba Medical College lapoktetsüsa yaritepba atema Directorate of Health and Family Welfare nung

inyakertem, NIMSR team, Japan International Cooperation Agency (JICA), contractors, ali kiburtem aser line departments ajak dang kanga pelar” ta CM Rio-i ashi.

“North East renlokba ajanga linük asoshi shilem tulu agütsü aser iba ya Nagaland aser Northeast nung healthcare tajungba akümba tetenzükir lir. Iba reju ajanga shirangertem tajungtiba nung anepalutetsü imlar” ta paisa shisem.

“Medical college lapokba ajanga Nagaland nung healthcare delivery system tajungba akümtsü. Iba college ajanga medical education dak alia

medical research facilities aser capacity building agtsütsü” ta H&FW Minister Paiwang Konyak-ia ashi.

“Tanü Nagaland nung doctor shia nisung 5386 atar aser iba ya linük nung tajemtiba lir. Ajisüaka tarutsü nung MBBS menden teimba akümtsü aser sen aika meindoki medical education azüngba ajanga doctor meperiba khuret ajema akümtsü amanger” ta pai ashi.

2013-2014 kum Nagaland sorkari “Establishment of New Medical Colleges” indang “Centrally Sponsored Scheme kübok DPR ka agütsüba sülen tanü Medical College lapoker. National Medical Council nungi temelaba ngua September 1, 2023 nungi class tenzükogo aser kaketshir 100 lir. Tarutsü anogotem Nagaland ya Medical Tourism indang tongti tesem ka akümtsü mangdang ayur” ta Minister Paiwang-isa metetdaksü.

“MBBS students mezüngbuba batch nung kaketshir 100 lir aser parnok ya Nagaland nungi 85 aser Rajasthan, Jharkhand, Bihar, Haryana, Kerala Madhya Pradesh o Manipur nungi 15 lir” ta Director cum Dean, NIMSR, Dr. Soumya Chakraborty-ia ashi.

Naga Regiment unit nem 'President's Colours' agütsü



New Delhi, October 14, 2023 (Agencies): Army Chief General Manoj Pande-i Naga Regiment indang Third Battalion nem 'President's Colours' sempet agütsüogo.

Uttarakhand nung aliba Kumaon Regimental Centre, Ranikhet nung Hokolbarnü Colour presentation parade agidang General Manoj Pande-i iba sempet agütsü liasü ta Defence Ministry-i sangdong ka nung ashi.

Gen. Pande-i parade repringba senzüba sülen Naga Regiment ajanga operations, training aser

sports dena military activities ajak nung kanga junga sayuba atema tenüngsang agütsü.

Paisa Naga Regiment indang unit tasen Third Battalion-i mapang tatsüka tsüingda shilem tajung agiba atema tenüngsang agütsü.

Iba sentong nung General Officer Commanding in chief, Eastern Command Lt. Gen. R.P. Kalita, General Officer Commanding in chief, Central Command Lt. Gen. N.S. Raja Subramani, Kumaon aser Naga Regiment den Kumaon Scouts personnel nungertem aden.

Atharva Foundation-i Ex-serviceman League Mon nem ambulance agütsü

Kohima, October 14, 2023 (DIPR): October 14, 2023 nü Atharva Foundation (Mumbai)-i Ex-serviceman League Mon nem ambulance ka tenla agütsüogo.

Iba sentong nung Home Commissioner Abhijit Sinha, IAS-i health & medical care indang jembu.

“Atharva Foundation (Mumbai)-i ambulance tenlaba ajanga Mon district nung ex-servicemen tajangzük angutsü. Meta talang pilar alidak lenmang

kanga majung lir aser rongdak medical nungdak adokdang ambulance service aliba ya kanga tajung. Iba ajanga shirangertem tekaratiba nung anasatiba medical facility-i anir oa anepaluteter” ta Abhijit-isa ashi.

“Atharva Foundation-i kanga dang mulungsoa iba tenla tulu agütsüba atema kanga pelar aser department-i ex-servicemen yariba atema tenüngsang agütsür” ta paisa shisem.

“Atharva Foundation-i ex-servicemen, tasürtem aser tang teinyakdak sepaitem yariba atema tenüngsang agütsür” ta Sainik Welfare & Resettlement Director Captain (IN) Lalsuonglieng Tonsing (Rtd)-i ashi.

Iba sentong nung KLBC Pastor Mhonchamo Lotha-i ambulance meshiteta sarasadem aser Home Commissioner Abhijit Sinha-i Ex-servicemen League Mon president nem gari agütsü.

Chümoukedima nung tetsür entrepreneurs atema sentong agi

Dimapur, October 14, 2023 (TYO): October 13 nungi 14 tashi CT Square, Chumoukedima nung WENN Bazaar (Women Entrepreneurs Network) agiogo.

Iba sentong ya “Year of Financial Literacy” omen nung ajemdaker National SC-ST Hub Office, Guwahati (NER)-i Women Entrepreneurs Network Nagaland (WENN) den yaritepa ayongzük.

Iba ya WEN Bazar tanabuba liasü aser tetsür entrepreneurs ajungkettsü atema sabang tajung ka lir.

Iba bazaar nung National SC-ST Hub Schemes indang special awareness campaign ka den E-

Tendering indang training ka agi. NSSH Guwahati nungi Senior Branch Manager-i National SC-ST Hub schemes aser tanga teyari balala PowerPoint presentation ajanga sayu.

NSSH ya Ministry of Micro, Small and Medium Enterprises (MSME) ajanga inyakba Central Sector Scheme ka lir. Iba scheme ya 2016 nungi tenzük aser SC/ST entrepreneurs ajungkettsü meranger.

NSSH ajanga SC/ST nisungtemi public procurement processes nung shilem agütsü tashi agütsür. Ministries, Departments aser CPSEs ajanga Public Procurement Policy nung

SC/ST enterprises-i 4% alizüksü akok. Iba scheme ya National Small Industries Corporation (NSIC) ajanga inyaker.

National SC-ST Hub nungi tajangzük angutsü atema SC-ST entrepreneurs-i NSIC Branch/NSSH Office mesüra NSSH website, www.scsthub.in nung online ajanga tenüng agütsütsü akok.

Iba workshop nung Expression Life founder Tasangkala Imchen-i Basic Decoupage Art, 7 Assam Rifles-i self-defense techniques aser Coffee Lady founder Zakietsono Jamir-i Home Brewed Coffee tesayubatem agütsü liasü.

Khezhakeno Welfare Society Kohima Hon jubilee mungogo



Khezhakeno Welfare Society Kohima Hon Jubilee mong sentong nung Women Resource Development and Horticulture Minister, Salhoutuonuo Kruse-i shilem agiba noksa angur.

Dimapur, Mongputeni/ October 14 (TYO): October 14 nü Khezhakeno Welfare Society Kohima Hon Jubilee NBCC Convention Centre, Kohima nung mungogo. Iba sentong nung Women Resource Development and Horticulture Minister, Salhoutuonuo Kruse alakteta jaoker liasü.

Sentong nung o jembiba mapang Kruse-i salem lemsatepba den küm 50 junga takok nung aruba atema Khezhakeno Welfare Society Kohima nem tenüngsang agütsü. Laisa, Khezhakeno yimtsüng ya Naga nunger yongtsü nung ajaki meteta aliba yimtsüng ka lir aser kin aika iba yimtsüng nungi prokshia ao ta amanger, ta ashi. Laisa, yimtsüng aser nüburtem lenla

ajak nung renloka aoba ngua pelaba lemsatepba den parnok ya temaotsü ma nung aoba lokti ka ta ashi.

Minister Kruse-i ashiba agi, aluyimba nung renloka aotsü atema lenmang aika lapoka lir ta shia, sentepa aliba lokti dang shishilembadak takhangba peritsütsü asoshi alu nung tsünüsenpongtsü tali adokdaksütsüla. Laisa, aluyimba mapang scientific methods aser machinery tem amshitsü nüngdakba lemsatepa liasü. Iba dak sendakba nung teyari asoshi sorkar den tongteprateptsü Kruse-i ajungshia liasü.

Maneni minister-i, lokti ajungkettsü atema longjemer külemi inyaksü ayongzüik. Lai, yimjung nung ajak den putepa alitsü ajungshia liasü.

Sentong nungsa o tatsüka jembiba mapang MLA, Dr. Neisatuo Mero-i, iba alizüng tongtetba atema Khezhakeno Welfare Society Kohima aser welfare society tentetertem nem tenüngsang agüja liasü.

Paisa, tetsü tebou temi prokba tang putui arur ta ashi, ta ashi. MLA-isa, sentepa aliba lokti dang tanü asüing putu nung ka küma longjemer parnok tetsü teboutem tsüngsü nung anidaksü ajungshia liasü.

Mero-i parnok dang lokti asoshi tajungtiba inyaksü merangtsü ayongzüik. Pai, sokar tenzükertem dang parnok kolen mapa ata lir idakji sorkar aser nüburtem atema nendaka inyaksü mepeshia metetdaksü. Paisa, lokti tejkadangi anir aotsü atema longjemer inyatsü ajungshi.

FAC nung departmental seminar agi

Mokokchung, Mongputeni/ October 14 (TYO): Fazl Ali College, Mokokchung nung Ita ana nung khen agiba seminar October 12 nü FAC Conference Hall nung agiogo. Iba sentong nung Asst. Professor, Department of Physics Nukshimoo shisalen sayur liasü. Nukshimoo-i "Electromagnetic Waves and the science of communication" indang onük nung jembiba liasü.



Nukshimoo

O jembiba mapang pai, radio waves indang concept aser iba ya koda mobile phones, radio, television aser satellite navigation radar aser microwave oven tem nung amshir iba indang lemsatepa liasü.

Cellphone antenna nungi electro magnetic signal transmit asüba indang rasaa ashiba mapang Nukshimoo-i, cell phone tali amshiba ajanga tebilemstü aika adokdaksüogo, kong iba ajanga health daka kongshitsü aliba densema lir, ta ashi. Cell phone electro-magnetic radiation ajanga tatsük adokdaksür aser tekolak nung temperature timba akümer, ta pai ashi.

"Experiment tem ajanga

koda radiation yagi nisung tain ka indang tekolak teret shilem 25, arishi 10 tain shilem 50 aser arishi küm 5 tain tanur ka tekolak teret shilem 75 agi ateta aier aji sayuogo, ta pai ashi. "Tanur ka koda tanurba südir yamaji radiation ya taliba ateta aier kechiyong parnok tekolak teret tapuba aser parnok tekelok cell nung taintem dang nungi fluid timba lir," ta pai shisem. Maneni item nungi koda jenboa litettsü, iba indang sensaksema liasü.

Sentong nungsa lokti nungi tasüngdangba balala asüngdang aser shisalen sayuri telangzüba agüja liasü.

C Edge College nung 10buba Fine Arts & Cultural Day mungogo



Dimapur, Mongputeni/ October 14 (TYO): October 13 nü C Edge College nung 10buba Fine Arts aser Cultural Day mungogo. Iba sentong ya "Promoting Culture Through Education" omen nung ajemdaker agia liasü.

Onük jembir English Department HoD Meyatemsu Longkumer-i, sobaliba wazüka ayutsü aser ajungkettsü atema education koda tongtibang iba indang lemsatepa liasü. Ojembirisa, sobaliba aser inyakyim putu ka nungi kati belenzüka aruba nung education-i koda tongtibang shilem agir iba indang jembiba liasü.

Kasa mapang nung Folk Art atema annual Naraosangala Prize ya kanga tongtibang lir kechiyong iba ya C-Edge College Principal-i tetsü Narosangla Longchar tenüng nung sponsore asüba lir.

Sobaliba tetoktepba nung iba ya ajak dang tongtibangtiba tetoktepba liasü, koba ajaki kanga yongyatepa ataogo. Taküm omen "Guardians of Tradition," liasü aser tetoktepba ya sketching dak rangloker agia liasü. Narosangala Prize ajanga kümshia folk art balala sayua arudar. Iba sentong ajanga

sempet aketba shilem agirtem dang tushiba masü saka asenek sobaliba wazüka ayutsü aser ajungkettsü koda tongtibang ibaji sayur.

Iba sentong nung kaketshir 100 dak temai shilem agia parnok sempet aser sobaliba dak sendakba nung parnok shisatsü sayua liasü.

Mezüngbuba session nung sobaliba ken tajungtem aten kong kaketshirtemi pei sobaliba takar sayua liasü. Iba sülen Solo Folk Fusion ka ajanga sentepa alirtem akasudakja liasü. Mezüngbuba session ya sobaliba sobutsü sayaba sentong ya agir tembanga liasü.

Tanabuba session nung tesem balala nungi sobaliba chiyongtsü saya liasü. Sentong nung shilem agirtemi sobaliba chiyongtsü tajungtem tendanga liasü.

Iba sülen maneni sobaliba tsüngsang balala saya-a liasü. Sentong nungsa kaketshirtemi traditional War Cry, Heel Kicking aser Spear Kicking sentongtem nung shilem agi.

C Edge College-i sobaliba benjungba dang masü saka sobaliba wazüka ayutsü aser ajungkettsü atema education koda tongtibang iba dak rangloker inyaksangshir.

Mokokchung Ao Officers Telungjem Inti Senden menogo



Mokokchung Ao Officers Telungjem Inti Senden Fazl Ali College Conference Hall nung agir kelen ketdangpurtem aser tongti shilem agirtem tangokba noksa.

Mokokchung, Mongputeni/ October 14(TYO): 3 Buba Mokokchung Ao Officers Telungjem Inti Senden tanu Fazl Ali College Conference Hall nung kaogo.

Tanu iba sentong nung Ao Senden Tir Wb.Chubawati Longchari tajungshi o jembidang taoba mapang nung Naga lima nung officer-temji reprangdangra noklang nung neter mesüra tir shilembo Aotsür Aor liasü aser item kuliji ajanga Ao kin dang "Land of Pioneer"ta ajar. Tanu Aotsür Aor officer ajema kümogo aji asünung tanu alir officertemi shingaia shinga daka meimlai Ao kin asoshi inyakangta adenshia aliba officer-tem ayongzüik.

2014 küm Chuchuyimpang yimtak 66 buba Ao Kaketshir Mungdang amungdang Nagaland Chief Minister Neiphu Rio-i Fazl Ali College Mokokchung nung

Commerce Stream tenzüksü nangzüik, saka tanu tashi magutsüi lir,iba asoshi Ao Senden-i Nagaland Chief Minister den ajurutepa jembidang Chief Minister-i iba Commerce Stream tekaraba nung tenzüka aotsü nangzükogota Ao senden Tir-isa telok dang metetdaksü.

Ao Senden Tir-isa Nagaland nung tejentiba College-ji Fazl Ali College ya lir, Aotsür Aor talisa officers-temi iba college ya ajungkettsü asoshi pei akokba yari inyaksüla, iba college ya ajungketra asen lima memeteti dang ajungkettsü teimla lirta ashi.

Mokokchung nung Officers telungjem tentetba asoshi Ao Sendeni kanga dang pelar,

- | | |
|--------------------|--|
| 1. Tir | - Lipokonen Jamir, Deputy Director SARS Yisemyong. |
| 2. Tatong Tir | - Er.Chubatashi Longchar, E.E R&B Mangkolemba |
| 3. Tongti Zülür | - Dr.Sentitula IFS, DFO(Forest) Mokokchung |
| 4. Repsem Zülür | - Yashikala Jamir Ao, Asstt.Prof Pol.Science FAC |
| 5. Sen O-tsü Zülür | - Imliyanger, CDPO Kubolong |
| 6. Kimen | - Mesütoba, Asso.Prof.(His) FAC |

kechiaser iba tentet ya ajanga Ao lima nung temelenshi tulu bener arutsütsü tamang akarta Ao Senden Tir-i ashi.

Tanu iba senden Sr.Technical Director NIC Mokokchung Er.Temsu Wathi ketdangsbu nung agi aser sentong nung Tsügrem lenisüba jazüka Fazl Ali College Principal Dr.I.Wati Imchen-I sarasadamba den tatem nung telok külemi sarasademer sentong tembang.

Tanu iba sentong nung Mokokchung Ao Officers Telungjem Temzüng Ozüng renemshi aser tebilematema lemsatepa liasü. Sentong nungsa küm asem asoshi ketdangpur tasen nübu itemya shima liasü.



October 14, 2023 nü 'Operation Ajay' kübok Israel nungi India nungertem tayimtsü ka nung New Delhi airport tonga aruba mapang tangokba noksa nung angur.

External Affairs Minister Jaishankar-i Vietnam aser Singapore semdangtsü

New Delhi, October 14 (Agencies): External Affairs Minister, S Jaishankar-i Amongnü nungi tenzuka anogo troknü Vietnam aser Singapore na semdangtsü, aser iba mapang nungji pai linük ana denji lenla balala nung amalitepa inyaksü atema jembitsü.

Jaishankar-i October 15 nungi October 18 tashi Vietnam semdangtsü aser iba mapang nungji linük ana tsungda lenla balala nung amalitep jenjang tajungba akümtsü atema jembitsü, ta Honibarnü Ministry of External Affairs (MEA)-i metetdaksü.

India-i Vietnam Armed Force nem missile corvette INS Kirpan agütsüba sülen ita asem shi dang lir Jaishankar-i Vietnam semdangter.

Vietnam ya Southeast Asia nung kanga tongtibang tesem ka nung aliba linük lir.

China-i South China Sea nung kanga ambangyima inyakba atema linük aikati

tebilemtsü akaba mapang nung India aser Vietnam tsungda asalentong tesendaktep tajungba akümba temaitsü India-i Vietnam armed force nem missile corvette INS Kirpan agütsü.

"India aser Vietnam na asalentong tsütsü tesendaktep lir. Vietnam ya asen Act East Policy nung tongti linük ka lir," ta MEA-i metetdaksü.

Jaishankar aser Vietnam Foreign Minister, Bui Thanh Son na leniba nung 18buba India-Vietnam Joint Commission on economic, trade & scientific & technological cooperation senden amentsü.

"External affairs minister-i Hanoi aser Ho Chi Minh City semdangtsü aser Vietnam nung tongti lenirtem den senden amentsü," ta MEA-i sangdong ka nung metetdaksü.

Paisa Vietnam nung aliba India nungertem ajurutsü aser Ho Chi Minh yimti nung Mahatma Gandhi indang

kürakyanglu ka semzüksütsü.

Jaishankar-i October 19-20 anogotem nung Singapore semdangtsü aser iba mapang nungji pai Singapore external affairs minister den tongti lenirtem ajurutsü; pa leniba nung Regional conference of Indian heads of missions senden amentsü, ta MEA-i metetdaksü.

2015 küm India aser Singapore tsungda asalentong partnership yanglua liasü aser iba mapang nungjagi tenzuka linük ana tsungda lenla aika nung amalitep jenjang tajungba kumogo.

Taküm India nung G20 minister tem summit mapang nung India aser Singapore nungi tongti ketdangsertem jurila senden aiben menogo.

September ita nung G20 Summit nung adentsü atema India-i tejaoker linük ka ama Singapore jaokba ama Ato kilonser, Lee Hsien Loong-i iba senden nung shilem agia liasü.

August 23 anogo ya National Space Day anogomong asütsü: Centre

New Delhi, Mongputeni/October 14 (Agencies): Taküm India nungertem Chandrayaan-3 mission takok ngua ita nung anentetba nungtem nung Honibarnü Centre sorkari, küm shia August 23 anogo ya National Space Day asütsü, ta official süa sangdongogo.

Indian Space Research Organization (ISRO) indang ita mission tasembuba Chandrayaan 3 takok ngua ita

south pole nung anentetba sülen August ita nung Union Cabinet-i August 23 ya 'National Space Day' asütsü, ta metetdakja liasü.

August 26 nü Ato kilonser, Narendra Modi-i Bengaluru nung aliba ISRO command centre semdanga India nungertem scientist tem nem tenüngsang agütsüba mapang nung pai-a August 23 ya National Space Day asütsü, ta sangdong.

Iba mapang nungji scientist

tem den jembidang Modi-i, "Tanü putu nung science aser technology tsütsü linük tejakleni odar aser iba ya ajanga putiotsü yanglur. Tarutsü lanurtem science & technology aser space nung shilem agütsü atema ajungmesotsü asoshi onoki Chandrayaan-3 lander ita nung anentetba anogo, August 23 ya National Space Day anogomong asütsü onoki telemtetba agiogo," ta metetdakja liasü.

India nungertem kibong ka Gaza nung lir

New Delhi, October 14 (Agencies): Gaza Strip nung alir India tsür ka aser lar kibongi Gaza nung lar ki toktsür aoba sülen Egypt anasa arrtsülen lir.

Hokolbarnü Israel-i Gaza Strip nung alir Palestine nungertem million 1.1 dang northern Gaza toktsür aienshiang, ta tuyuba sülen lar kibonga southern Gaza-i apusoa ao.

Osangbener den jembidang Jammu & Kashmir nungi Gaza-i oa alir India tsür, Lubna Nazir Shaboo-i, "Anepdang züngia kü den kinüngbu aser jala ozü aseme ki toktsür apuso aser timtem aika ajangshia Gaza south tsütsü arrtsülen tongogo. Israel nungertem bomb ajanga gari lenmang ajak raksaogo aser gari nung sensüsempongtsüji tebilemtsü tulu lir," ta metetdaksü.

Tang tashi nung Gaza nung alir India nungertem nisung pezü dang jangjateta lir, aser parnok rongnung Shaboo densema lir.

Shaboo-i, "Onoki yangi dang alitsü aser Egypt telungi aitsü melatsü asü memelatsüar ata-a dang alitsü, kechiyong yangji ozü tanur ana züngdar," ta metetdaksü.

Gaza nungi Egypt-i aotsü lenmangji Rafah dang lir saka ibajia Hombarnü shibangadokogo, anungji Gaza nungertem Egypt-i jena aotsü lenmang mali.

Region nung aliba Indian diplomatic missions-i Gaza aser Israel nungertem aliba India sensotem kümüzsütsü nükjidong nung parnok den maneni tongtepratepdar aser ketdangsertemi rara aliba tesem nungi parnok anitetsü meranger.

October 7 nü Hamas kiralongrartemi rockets meyirjang aika amshia Israel amakba sülen kobi melii Israel-i Gaza amak tenzuka liasü. Rara tenzükba sülen anogo tenetnübuba tashi nung Gaza Strip aser Israel na nung nisung ajak senteper 3,000 dak tema süogo.

Gaza kija nunga nisung 1,799 shi süogo, ta Palestine ketdangsertemi metetdaksü.

Israel-i ali nungi Gaza amaktsü nükjidong nung Hokolbarnü Israel Defence Forces-i Hamas kübok aliba territory nungi Palestine nungertem million 1,1 shi aienshitsü tuyua liasü.



October 14, 2023 nü Chennai nung Congress Parliamentary Party Chairperson, Sonia Gandhi aser AICC General Secretary, Priyanka Gandhi Vadra nati Tamil Nadu Pradesh Congress Committee office ketdangpurtem aser party nung inyaktertem den senden amendang tangokba noksa nung angur.

Laos linük nung company kati Odisha nungertem aayanger 35 pua lir

Bhubaneswar, October 14 (Agencies): Odisha nungi aayanger 35-i, Laos nungertem parnok mapa inyakba company kati parnok pua lir, ta metetdaksü.

Parnok linüki anir arutsü atema sorkar nem inyakdaksüner, ta sorkar dang mepishia aayangertem jagi video clip ka lemsatepogo.

Aayangertem jagi, ita ka ser tesadang tejaklen parnok mapa inyakba plywood company anena liasü, ajisüaka parnok India-i meyipa aotsü memelar aser taa-a magütsür, ta metetdaksü.

Odisha nung Kendrapara district kübok Rajkanika block nungi aoba aayangertem jagi, company jagi tashiyim amshia parnok indang passports ajak rakzükogo, ta metetdaksü.

Iba osangji state sorkar nem metetdaksüba sülen Chief Minister, Naveen Patnaik-i

ketdangsertem dang aayangertemji anir arutsü atema maparen tenzükang, ta ketdangsertem dang tuyuogo.

Chief minister-i tuyuba ama state labour commissioner-i Laos nungertem aliba Indian Embassy ketdangsertem den tongtepratepa inyakdar, ta CMO ketdangser kati metetdaksü.

Laos nungertem aliba Indian Embassy-i Odisha sorkar dang, aayangertemji India-i anir arutsü atema maparen ajak inyaksü ta shiogo, ta paisa metetdaksü.

Aayangertem jagi mezüngbo video ji yimertem den dang lemsatep, iba sülen yimertemi local MLA nem iba osangji metetdaksü; tesüsa local MLA-i state sorkar den iba osangji lemsatep.

Aayangertem rongnung ka, Saroj Palai-i, "Onok ket nung sen mali, mesüra chiyungtsü mali. Iba dak alia onok meyipa aotsü memelar," ta metetdaksü.



Israel-i Palestine amakba anema October 14, 2023 nü Kolkata nung Jamiat Ulema-e-Hind züngsemtemi longkak aita jajaba noksa nung angur.



TIR YIMYIM

YIMOBILEM (EDITORIAL)

DIMAPUR AMUNGNÜ, MONGPUTENI (OCTOBER) 15, 2023

Tsüngrem medeni takok anguba

Alima nung nisungtemi anguba takok ajak ya Tsüngrem nungibo masü. Aji oda, Sayutsünger tapu 8 tekong 14 nung yamai ashir, "oda temeshipur nisung dak tamajung inyaker dak ama ataloker aser ano nisung tamajunger dak temeshi pur dak ataloker ama ataloker." Tetezü alima nung asenoki temeshipurtema ta bilemba purtem kanga timtema angur saka nisung tamajung shirnoki nisung tepseter, auyar aser rakzükratemer parnokjiang temeshi pur nem moatsür ama jangratema azükarua aliba angur. Aji oda, asenoki aseni inyakba aser aginüba mapatem nung Tsüngrem dang nungi takok aser tajangzükjiang tuluba kümdaktsüra, atangji takok angutsü aser tajangzüka alitsü. Ajisüaka, item takok aser tajangzüktemji Tsüngrem maden anguba takoktem asütsü. Nisung asoshi shitak mesükba lenmang ka lir saka tatembangji tasüba ta asüba temoatsü aser takoktemji itemji asütsüa akok. Iba jagi kasa Sayutsünger tapu nung ashir, "oda Tsüngrem tsübuba pur shiri Pa dang tsübur, parnok jungküm saka tamajunger asoshi asaktsü." Ibaji alima nung Tsüngrem tsüburtem asoshi anisüngzük o aser Tsüngrem metsüburtem atema tekümdangtsü o asütsü. Atangji, tanü asen lima nung nisung aika tiyazü jembia pei mapa nung takok angur, rakzükratema takar akümer aser tashiyim agi yimten mapa nung takok angur. Item takok ajakji asenoki Tsüngremi moatsüba takoka ta bilemer, anungji tamajung mapa inyaker takok anguba takoktem ajak asoshi asenoki Tsüngrem nem tenüngsang agütsür. Nisung kar tepseter mesüra yirutsür takok anguba, nisung kar temulung jashidaktsür takar akümba, ochimashi mapa kar ajanga takok angubattem asoshi Tsüngrem nem tenüngsang agüja sarasadembaji Pai agizüktsü asü. Tsüngrem medeni takok anguba nung lendong lir ta meteterem alima tanishirtem rongnung Mosa-a ka liasü. Anungji, Tsüngremi kodang Pa dang Egypt lima nungi Israel nungertem aniteta anir aotsü nungloktsü, Mosai Tsüngrem dang ashi, "item nübertem anir oang ta nai kü dang ashir, ajisüaka kü den shiba yoktsü ajibo nai kü dang mashir....nü tatenba onok den marura, onok yang nungi anir touma." Anitet 33:12 & 15." Kibubai langzü, Kü tatenba nü den aotsü," Anitet 33:14. Asen den Tsüngrem lir ta züngzünga meteter inyakba aser takok angubaji jangratemtsüka lir. Tanü asenok anema alitsüa akok mesüra mapa ajak nung takok aser tajangzüka ngua alitsü akok, ajisüaka item takok aser tajangzüktemji Tsüngrem adenba agi anguba masütsüa akok. Aji oda, asenok dangi aruba temoatsütemji kong nungi aruar, itemji jangjatsübaji kanga tongtibang lir. Ashiko, nai Tsüngrem masü saka rongsen arishiba agi tajangzük anguba asütsüa akok mesüra Tsüngremi mulungba masü saka nai mulungbalen alima konang bushiba agi takok angu asütsüa akok. Ajisüaka, Mosai ashiba ama, asen jakdang aser asen meketa aliba tsükchirtem madak takok nguyonga oaka mesüra mamatzü aser ninang mojitsü talubosa alidak Kanan lima tashiji tonga oaka, Tsüngrem tatenba medenra amajok ta asenoki metettsübaji kanga tongtibang lir. Tsüngrem medeni anguba takokji takok masü, ibaji asen tenük agi ngua alima tsüngdang samatsüba mapatem lir. Tanü asenoki nisung tamajungertem aika rongsen aser alima yimten tashi madak jangratema aliba angutsü, ajisüaka Tsüngrem medeni anguba rongsen aser tajangzüktem jagi asenok dangi memenui teraksa aser tebilemtsü khuret tulu bener arutsü. Atangji, takok aser temoatsü ajakji Kibuba nungi arur, anungji asenoki Pa dang meshir. Aji oda, tanü asen akaba rongsen, takok aser maongka ajak ya shitakba Tsüngremi agütsüba temoatsü asü masü ta reprangdangtsübaji kanga tongtibang asütsü. Asen kidang Tsüngremi memulungba rongsen ayuba agi aser Tsüngremi memulungba tashi amshiba agi tarutsü senmangertem kangshidaktsütsü agibo, tanü Tsüngremi mulungba inyakba temoatsü agi tarutsü senmangertem anisüngzüka lidaktsü tajungba asütsü.

OLEMSABANG

KIYIMBAKULIZÜNG:

Tenlaki Nungi Mainshitsüla Vs Tenlaki Nungi Ainshitsüla

~ Imli P Lemtur, Jorhat

Okila:

Kiyimba ya, Baptist Khristantem asoshi temeshi mapa (sacrament) asem rongnung ka lir. Süra, kiyimba kulizünya Tenla Ki nung dang agitsüla asü, moapu aser tesem balala nunga kulizüng agitsü akok? Baptist tamangbai kechi ashir? Laishibai kechi ashir? ta "Yanglushidi Sensaksem Sabang" (YSS ya Aor whatsapp group ka lir) nung sensaksem agia liasü. Aser iba onük ya züngsem tajung kati tasüngdangba yamai asüngdangba nungi adok; "Asen Aor karbo Youth Oasis Dimapur nung moapu nung sati kuli agiba lir, sürapang parnokji outside of the Church sati kuli agibaji tim asü masü? Tim mesüra parnok dangji arogoi kechi ashitsü?" (Mr. Ben Jamir).

Iba onük nung sensaksem akadang, züngsem aikati shisa tajung lemsatep aser kari tongtibang tasüngdangbatem (questions) aika asüngdang. Item shisa tajung aser tasüngdangbatem kar iba ocet nung angutsü. Ajakbo iba ocet nung müka mezülutetba asoshi nemjemer. Membertemi lemsatepba shisatsü/tasüngdangba kar den kiyimba yimyaren (Marriage Rituals) tenzükba indang aser Laishiba tesayuba den rajemshi o tatsüka shisemba angutsü.

Olong Ratet: Khristan Kiyimba Tesayuba aser Yimyaren:

"Khristan Kiyimba Tesayuba" tetezü, Laishiba nung kiyimba indang kechi ashir? Tamangertemi Kiyimbaji koda angatet? Tanabuba nung "Khristan Kiyimba Yimyaren" tetezü, koba tesem nung satitsüla, komala süoshi agitsüla, sentongji koma agitsüla, ki sobutsü komala, wedding ring, wedding card amshitsü/mamshitsü? item amala.

* Temeshi Kiyimba Kong Agitsüla?

Shilem agirtemi yamai lemsatep. Shisa lemsar tenüngbo madoktsür, saka parnoki züluba kürak saka spelling metongshitsür lemsar. Parnoki yamai shia liasü.

- * "...Tantsur, tambur kümer arogo ajangasa kibong kümnertem, kidang dang satitsüba aika lir. Karbo sentep kidang lokti nung satitsü aaker ta sür, kidang dang Pastor den, khuli agütsütsü deacon ana arua satitsüba lir. Tensa aser taküm yimya jagi kechi ashir ta angatettsü nungdaka kümogo."
- * "Ano karbo court nung sati kuli agizüka kibong akümer, itemjia koda?"
- * "Tantsür tamburbo kidanga sati kuli agütsür saka lanurtembo ajak tenla kidang dang satitsü ta renema lir. Tensa aser mapang sülen arogo anidakra aji agi nübur aika mashileni aotsü ana nung lir, anungji Temeshi kiyimbaji temeshi tenla kidang dang agitsüla" Court marriage aser marriage registration ana ya bendanga angatettsüla. Marriage registration ya tongtipang document ka lir saka tenla kidang sati kuli agizükba sülen dang oa registration agitsü ta inyaker.
- * "Tantsür tambur, lanur ajak lokti tekülem mapang mesüaka tenla kidang dang temeshi kiyimbabo agidaktsütsüla."
- * "Karbo shirang yipden nung lia satitsüba lirko. Ajia koda?"
- * "Sema nungerbo, wedding home moapu nung yanglur, yangjidang Pastor aser tenzükertem arua satitsüba nguogo. Parnokjia Baptist-sa.
- * "Nia alima aika nung moapu, hotel, park ama nung satiba nguogo."
- * "Khristan kibong ka akümdang Temeshi Tenla kidang sati kuli agiba ya Laishiba tesayuba lir aser ya asen sobaliba masü, anungji koba kin südir süang, Baptist Pastor kati Baptist züngsem ayir ka aser asangur ka outside of the church sati kuli agütsüba ya kenyongi Laishiba anema lir aser Baptist distinctive agi memelar. Anungji yamaji kar satir lira, Pastorji license meyipa meshitsüla aser satiba kibong nungi certificateji meyipa meshitsü masü na? ta angateter."

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US nungi temeshi aini Yirusalem-i aoter telok ka pei ki tongogo



Yirusalem

October 14, 2023: Florida nung aliba Arogo ka nung pastor densema Arogo nungi telok ka temeshi aini Israel-i oa liasü, ajisüaka tang Israel aser Palestine na tsünga rara aliba agi parnoki tesem aika mesemdanget.

Pastor Alan Brumback den par kibong züngsemtem aser Arogo züngsemtem temeshi aini Israel-i oa liasü. Brihostibar ayaterm nung parnoki tayimtsü ka mekazük aser Tev Aviv nungi apusoa US-i ao, ta parnoki facebook post ka ajanga metetdaksü.

Naples nung aliba First Baptist Church nungi züngsemtemji October 2 nü Israel tonga oa liasü aser anogo 10 nü semdang saka parnoki

tesem aika mesemdanget. Parnoki temeshi aini Israel-i aotsü atema küm ka piyong sentong yanglua liasü aser nisung shia dollar sen 6,000 bendenba sülen Israel-i ao.

"Israel tzüymküm nungi tenzüka lisem tashi aser tenem nungi lenden tashi nung Laishiba nung shia aliba tongtibang tatalokbatem tesemtem semdangtsü aser Laishiba taroki ia bushitsü; Tsüngremi Par nüburtem dang ajungba, tesüiba, tang aser tarutsü indang asadangtsü atema onok jaoka liasü," ta parnoki metetdaksü.

Iba tour nungsa Tejen Lai aser Tasen Lai nung aliba tesemtem aser tan putu Israel indang puti otsü bushitsü

sentong liasü ajisüaka tetenzük nungi Arogo indang website ajanga security dak sendakba tebilemtsü metetdakja liasü; yamaji tang tensa nung ajemdaker parnok sentong melenshitsuä aküm.

Pastor Brumback-i ashiba agi, parnoki Western Wall semdang aser Yirusalem atema sarasadema liasü.

October 7 nü Hamas teloki Israel amakba sülen Israeli Defence Forces-i tang tashi Gaza Strip amaker. Hamas teloki America nunger densema Israel nunger aika pua lir.

Pastor Brumback-i, pa leniba nung par telok hotel ka nung jenoka liasü aser yangji parnoki kentena sarasadema among, ta metetdaksü.

ANO GO ABEN TSÜNGREM DEN

TSÜNGREMJI KODANGSA TAJUNG?

"Kibubai ajak madak ajunger; Aser Pa temeim, yimlibilemPa mapa ajak madak lir" ~(T.Ken 145:9)

Tajung Tsüngrem dang asen temulungjang taroktiba agi amanger, saka Pa ajungba indang angatetsübo kanga dang züba züba dang agir. Corrie Ten Boom-i yamai zülu "Aiben nisungi yamai jembir, Tsüngrem ajungbaji koma ka dang ajar?" Rongsen, ki-aküm tajung moatsüba, tsüngsang tajung, mopung tajung aseni aginüba mapang nung dang Tsüngremii tajung asü? Masü saka, khuret, tejashi, shisabulu, makamait tia ajak nung asen Tsüngremji tajung lir. Israel nungertemi aiben Egypt lima nungi adoker arem nung jajadang chiyungtsü aser tajemtsü tzü angudang dang Tsüngremji tajung ta bilema benshi. Aya dangbo, tzüra dangbo Tsüngrem anema apuso. Aji saka, Tsüngremi kodanga parnok mesentok, kechiaser Tsüngremji teti dang tajung liasü.

Tanü ne mulungjang teraksa, nüktsü aser teimla makaba mapang nung ne tamang akanga yutetba ajanga Tsüngremji tajung ta shitettsü. Koba mapang, tensa nung südir süaka Tsüngremji teti tajung lir.

SARASADEM:

O Kibuba, onoki na mangatetba agi ne ajung onoki meshisadangtet, saka nabo teti dang tajung lir: Amen

Chhattisgarh nung Khristan 30 dak azük; 5 bo hospital nung among

October 14, 2023: Tawa Chhattisgarh state nung Hindu yimsü alia amangertemi Khristan 30 amakba sülen Khristan pongubo kanga mejungi yirua hospital nung among, ta International Christian Concern (ICC)-i metetdaksü.

Hindu nungertem jagi Khristan yimsü dangi meyipertem tanaben Hindu yimsü dangi meyipdaksütsü nükjidong nung Khristantem jaoka liasü.

Yimdak Khristan 30 jaokba sülen yimsüsürtemi parnok dang Hindu yimsü dangi tanaben

meyipang ta ashi, ajisüaka parnoki memelungba agi Hindu yimsü alia amangertemi parnok dak azük, ta ICC-i metetdaksü.

Kanga mejungi yirurtem hospital-i anir aotsü atema ambulance ka aja, saka Hindu nunger lokti jagi ambulance ji nokdang; tesüsa kanga mejungi yirua alir nisung pongu hospital-i anir ao aser tanüngba Khristantemji meindok.

State nung Khristan lenir kati, "Tesüiba hopta ishika tsünga Khristantem anema inyakba kanga bulua kümogo, kechiyong kobi melii state nung

assembly elections agitsü. Yimtenren lenirtemi election nung takok angutsü mechi nung yimsü nung ajemdaker Khristantem takoksa anguba ya tejashitsuä lir," ta ashi.

Tang India nung anti conversion ozüng benoka aliba state 11 lir aser item states rongnung Chhattisgarh densema lir. Ano India nung Khristantem anema inyakba tatalokba teimtiba state tem rongnung Chhattisgarh ya jengang tanabuba nung lir; mezüngbuba jengang nung Uttar Pradesh lir.

America nunger shilem 50 dak temai Laishiba ano tali züngner

October 14, 2023: America nunger shilem 50 dak temai parnoki Laishiba ano taliba züngner, ajisüaka kuli balala ajanga yamaji meinyakteter, ta ashi.

American Bible Society's State of Bible report ajanga ashiba agi, America nunger shilem 52-i parnoki Laishiba tali züngner ta ashi aser shilem 14-ibo, tesüiba küm ka tsünga nung parnoki akhi mapang nungi Laishiba tali züngogo, ta ashi.

"Iba ya, 'Nai exercise ano tali aginer asü?' ta asüngdangba den kasa lir. Inyaknüba aser atangji inyakba naji balala. Ajisüaka tejangrababo lir, ta asüba

metetbaji kanga tongtibang," ta report nung shia lir.

Research agirtemi Laishiba ano tali züngner America nunger shilem 52 dangji, Laishiba tali azüngtsü jangrayonga kechi kuli ajanga yamaji meinyakteter, ta asüngdanga liasü.

Telangzüba agütsür shilem 26-ibo, "Laishiba tali azüngtsü atema mapang peria mali" ta ashi.

America nunger nisung pezü shia nungi katibosa hopta shia Lai azünger, aser hopta shia Lai azüngertem rongnung shilem 72-i, pei taküm nung tesendaktep atema tongtibangtibaji Yisu Khrista lir, ta langzü.

Aoyimti Baptist Arogo densema telok aseme Anitet Early Intervention Centre project tenzüker



Dimapur, Mongputeni/ October 14 (TYO): Keystone Education Society, Charis Educational Society aser Aoyimti Baptist Church senteper külem project- Anitet Early Intervention Centre Aoyimti October 14, 2023 nü tenzükogo, ta sangdong ka ajanga metetdaksü.

Iba sentong ya

ShisamolukTaktang, Aoyimti Baptist Church, Dimapur nung agi aser Pastor Temsu Jamir-i okila jembia liasü.

Kasa sentong nung Keystone Education Society Tir Kr. Lanusongla, Administrator Charis High Academy, Wt. Ayo Aier aser Deacon T. Merang Aier nungeria o tatsütsü jembia

liasü.

Parnok ajaki angazükba tsütsü timtem aliba tanurtem aser angazüktsü asakba tanurtem yaritsü nüngdak, ta ashi.

Iba mission ya teyari balaka nüngdakba tanurtem nem tekaratiba nung teyari services balala agütsütsü atema lir, ta parnoki metetdaksü.

Tanur ajak taküm nung tajungtiba agi tenzüksü temsüa lir, anungji teyari balaka nüngdakba tanurtem school-i ao tenzükdang pur-medemertem den külemi liromedema angazüktsü atema renema lidaktsütsü nükjidong nung team-i inyaktsü.

Iba sentong ya Asso Pastor (Youth), Imtisunep leniba nung

agi, deacon Imlisashi-i sarasadema sentong tenzüker aser sentong tembanga Asso Pastor (Women), Wt. Yashila-i sarasadema liasü.

Anitet EIC den contact +919362820373 aser +918837498442 ajanga tongteprateptsü akok aser anitetcentre@gmail.com ajanga mail asütsü akok.

AO OSHI ANGAZÜKDAK: TANÜ ANGAZÜKTSÜBA OJANG



Sangwali

(n) anepdang anübo madok saka sangwa tenzükba mapang (day break)

* Onok tanep sangwali apuso.

Sangyu

(n) yi shilokja külemba (traditional way of sanctification of a site)

* Sangyu mapatem ya limapur mapang putiri inyak.

OLONG PAITEP # 6667

1					2					3
								4		
5		6			7					
8										9
								10		
				11	12					
		13								
14					15					
				16						

TIPIEN

1. O jembitsü tashi	- 8
5. Süngjang tapu ka	- 5
7. Tekanük nung enokba	- 5
8. Tekka amtep	- 5
12. Tzüik asendak	- 5
14. Tsüngpang tema aliba	- 5
15. Ken atenba yimya	- 5
16. Asangur	- 8

LANGTSÜNGLEN

1. Tepok telung nung shilem ka	- 7
2. Tamajung aküm	- 5
3. Chi den külemi achiba	- 3
4. Meimchir alimai aruba	- 3
6. Laishiba nung ayong ka	- 4
9. Tarutsü nükla	- 7
10. Tamendakdak/Nükjido	- 4
11. Tenük-telen mejungi aküm	- 5
13. Terok nungi adokba	- 3
14. Meimchir telemsa	- 3

OLONG PAITEP # 6666 TELANGZÜBA

TIPIEN :

3. Tema, 5. Tawa, 7. Arok, 8. Jaja,
9. Ati, 10. Oru, , 13. Ani,
14. Asangsang, 15. Asü, 16. Ama,
18. Asa, 20. Ayok, 21. Moat,
23. Yiru, 24. Amak.

LANGTSÜNGLEN :

1. Kar, 2. Wako, 3. Taju, 4. Mejang,
5. Taa, 6. Waitsü, 11. Rasa,
12. Anem, 13. Angati, 14. Asüyim,
16. Akok, 17. Amok, 19. Alu,
22. Aya.

NAI-A YA METETTER MA

1948 KÜ NUNGI ISRAEL NUNG PRIME MINISTER INYAKERTEM YAMAI :

Name (Lifespan)	Term of office	
David Ben-Gurion (1886-1973)	14 May 1948	10 March 1949
	10 March 1949	1 November 1950
	1 November 1950	8 October 1951
	8 October 1951	24 December 1952
Moshe Sharett (1894-1965)	24 December 1952	26 January 1954
	26 January 1954	29 June 1955
David Ben-Gurion (1886-1973)	29 June 1955	3 November 1955
	3 November 1955	7 January 1958
	7 January 1958	17 December 1959
	17 December 1959	2 November 1961
Levi Eshkol (1895-1969)	2 November 1961	26 June 1963
	26 June 1963	22 December 1964
	22 December 1964	12 January 1966
Yigal Allon (1918-1980) Acting	12 January 1966	26 February 1969 ^[2]
	26 February 1969 ^[2]	17 March 1969

Maneni asung adok nung...

Israel nungi Assam nunger kaketshir 5 kidangi aruogo

Guwahati, October 14, 2023

(Agencies): Assam nungi kaketshir 5 tashi Israel nungi state tonga aruogo.

Operation Ajay kübok Israel nungi India nunger kaketshir 235 anir aruba special flight ka nung par pungu aru.

"Israel nungi kaketshir 3 den phone ajanga jembioigo aser parnoki Narendra Modi-i aniba sorkar dang pelaba metetdaksü" ta Assam cabinet minister Ranjeet Kumar Dass-i ashi.

"Assam nungi kaketshir 5 parnok ki tonga aruogo. Surajit Kalita, Vivek Chetry, Pritam Sarma, Naziha Tarannam aser Debajit nenok ajak Assam-i aruba pelaa agizüker" ta Dass-isa ashi.

'Operation Ajay' kübok Tel Aviv nungi New Delhi tashi tayimtsü tanabuba Honibarnepp tonga aru.

Israel nungi aruba tanabuba tayimtsü nung kinü tanur ana dena Indian senso 235 tashi aruogo ta External Affairs Minister S Jaishankar-ia metetdaksü.

Minister of State for Ministry of External Affairs Rajkumar Ranjan Singh-i Delhi Airport nung India nunger den ajurutepa sensaksema liasü.

Manipur police aser sepaitemi prangpong-injang aika nguogo

Imphal, October 14, 2023

(Agencies): Telungpur kari prangpong injang aika bener aruba osang angazükba sülen Manipur nung central aser state police telok kati cordon and search operations (CASO) inyak.

Iba mapang parnoki prangpong-injang aika ngutetogo aser yimtsüing 3 nung tesem 150 shi ka mita ao.

Hokolbarnepp parnoki Charoi Khullen yimtsüing nung CASO inyak. Idangji tem prangpong-injangtem angu- 9mm Carbine, SAF - 1998 with 01 magazine, 303 Rifle - 01 number, 32 Sniper Rifle with magazine and 04 rounds, 7.62 mm (AK series

ammunition) with 90 rounds, No. 36 HE Hand Grenade - 02 numbers, 7.62 mm SLR ammunition - 06 numbers, No. 33 detonator - 05 numbers, 9mm ball ammunition - 45 rounds, safety fuse - 35 cm. approx aser gun powder - 01 plastic container.

October 13, 2023 anepdang Imphal West District Police aser Kameng, Khamran o Mana Ingkhol nung S.F. ajanga CASO inyak.

Idangji parnoki item prangpong injang aser osettem den gari ka angu- Carbine - 3 numbers, Carbine magazines- 5 numbers, 9 mm pistol - 1 number

with 1 magazine, 7.65 lama pistol - 1 number with magazine, 36 HE Granade - 3 numbers, Air gun with scope - 1 number, Ammunition: 67 nos. of 9mm round and 78 numbers of 0.45mm round, one plastic magazine of INSAS rifle, BP Jacket - 8 numbers, Police uniform - 13 pairs + 1 pant, Jungle boot - 8 pairs, Dummy rifle (wood) - 19 numbers, Wireless set - 3 numbers with 4 chargers, Receipt booklet of KCP (PWG Kangla), one attendance register, mobile phone - 6 numbers aser Maruti Gypsy without a registration number plate.

Maneni asung adok nung...

Maneni asung adok nung...

MOLUNGNEN O



Tasüba Anogo 28th Sept 2023

Onoki teti meima aliba adianu asür Imkongmeren (Mongsenyimti) onok asoshi len sayur aser shisatsü tzüpokdak. Ammann milen züksep ama na asen Tsüngrem-i nu anükodong nung Pa den alitsü anir aonung onok molung kanga züruber aser nüktzü ayimer.

Onok mangyim jashi mapang Arogo, Yimten, Kiyonger, Anukapang, Tetsu tuku aser temeimba tembar den yimti nung aliba nüburtem kwikati sarasadem, Rongsen, nübu tenla aguja yariogo nenok ajak dang kangasa pelar. Asen tulusang Tsüngrem-i nenok temeim mapa tajung moajangma ta ozü tamang sarasadem.

-Temeim Kinungertem.

30% OFF Special Discount
From 25th Sep' - 25th Oct' 2023

Prepare with the **Best Institute** for NPSV Vacancies 2023

EAC - 16	BDO - 03	D.Comdt - 03	WRDO - 01	JA0 - 02
APRO - 01	SA - 43	SI - 04	I.Asst - 02	I.Sup - 03
ICS - 09	M.Asst - 01	Insp. - 01		

ADVANCED FOUNDATION COURSE FOR NPSV 2023 - 2024
8 Months Course Only at Rs. 45,000/-

eduversitykohima@gmail.com +91 7005114715 BOC - Kohima follow us on

Manipur police aser sepaitemi prangpong-injang aika nguogo

Imphal, October 14, 2023

(Agencies): Telungpur kari prangpong injang aika bener aruba osang angazükba sülen Manipur nung central aser state police telok kati cordon and search operations (CASO) inyak.

Iba mapang parnoki prangpong-injang aika ngutetogo aser yimtsüing 3 nung tesem 150 shi ka mita ao.

Hokolbarnepp parnoki Charoi Khullen yimtsüing nung CASO inyak. Idangji tem prangpong-injangtem angu- 9mm Carbine, SAF - 1998 with 01 magazine, 303 Rifle - 01 number, 32 Sniper Rifle with magazine and 04 rounds, 7.62 mm (AK series

ammunition) with 90 rounds, No. 36 HE Hand Grenade - 02 numbers, 7.62 mm SLR ammunition - 06 numbers, No. 33 detonator - 05 numbers, 9mm ball ammunition - 45 rounds, safety fuse - 35 cm. approx aser gun powder - 01 plastic container.

October 13, 2023 anepdang Imphal West District Police aser Kameng, Khamran o Mana Ingkhol nung S.F. ajanga CASO inyak.

Idangji parnoki item prangpong injang aser osettem den gari ka angu- Carbine - 3 numbers, Carbine magazines- 5 numbers, 9 mm pistol - 1 number

with 1 magazine, 7.65 lama pistol - 1 number with magazine, 36 HE Granade - 3 numbers, Air gun with scope - 1 number, Ammunition: 67 nos. of 9mm round and 78 numbers of 0.45mm round, one plastic magazine of INSAS rifle, BP Jacket - 8 numbers, Police uniform - 13 pairs + 1 pant, Jungle boot - 8 pairs, Dummy rifle (wood) - 19 numbers, Wireless set - 3 numbers with 4 chargers, Receipt booklet of KCP (PWG Kangla), one attendance register, mobile phone - 6 numbers aser Maruti Gypsy without a registration number plate.

Maneni asung adok nung...

'Memenoi nenok aliba tesem toktsür oang: Israel military



Honibarnü southern Israel kübok Gaza Strip den arrtsü leni aoba mapang Israel nunger sepai kati armoured personnel carrier (APC) ka nungi V-sign ka sayuba noksa nung angur.

Jerusalem, Mongputeni/ October 14 (Agencies) Israel military-i Honibarnü sangdong ka ajanga Gaza yimti nung alirtem dang Israel nunger sepaitemi mamak tsüingda memenoi pei talidak toktsür aotsü metetdaksüogo.

Israel nunger sepaitemi Gaza nung Hamas pur amaksü imla aliba mapang ka nung Israel-i northern Gaza nung alir million ka dak tema south-i aotsü asoshi lenmang ana lapoktsüogo.

Military otongdar Richard Hecht-i ashiba agi, anepdang 10 ako nungi nikongtsütsü 4:00 ako tashi Gaza tzüküm nung aliba lenmang aser Gaza teyongtsü ajanga süiba lenmang ajanga kecha tetsükdaksü makai nüburtem south leni otettsü.

Honibarnü Gaza nung alirtem northern zone toktsür jena aotsü atema bus, gari aser gado agi atsüba garitem sünga khu oshir apusoaogo.

Anogo kwika mapa lapoktsütsü iba indang kecha memetdaksü Hecht-i osangbenertem dang ashiba agi, "iba inyakyim atema mapang agitsü ta onoki meteta lir saka onoki nüburtem dang meno meyang masütsü ajungshir."

Civilian tem nem mapang peria agütsütsü atema United Nations, United States aser European Union-i Israel dang parnok sentong thinentüsü shiogo.

Israel military-i parnoki Gaza city dak rangloker inyangshitsü ta shiogo, kechiyong taoba hopta Israel maka nisung 1,300 tepsetba atema aitsür aliba

Hamas lenirtem iba yimti nung amenoka lir.

Gaza ketdangsürtemi ashiba agi, taoba anogo tenet tashi Israel-i Gaza amakba sülen nisung 2,215 shi süogo.

Kasa mapang nung Lebanon nung Iran-i teyari agütsüba Hezbollah teloki ashiba agi, parnoki Honibarnü linük ana tsüingda raktepa aliba tesem ka nung Israel nunger amendaker aliba tesemtem nung bomb pokloksüogo.

Hamas puri October 7 nü ajungbena Israel amakba sülen Hezbollah aser Lebanon nung Palestine nunger teloktem aser Israel nungertem arrtsü adena maneni khatapa arudar.

Hezbollah-i, Lebanese Shebaa Farms nung Zionist tem amenoker aliba tesemtem guided missiles aser mortar shell tem amshia makogo, ta Shiite telok yagi sangdong ka ajanga metetdaksü.

Shebaa Farms anasa AFP correspondent kati bomb pokloksüba aser iba tesem nung mokozü atoka anguba indang osang agütsüogo.

Honibarnü nungi tenzüka anogoshia ama Israel aser Hezbollah o Lebanon nung Palestine nunger teloktem tsüingda khatapa arudar.

Lebanon army-i Honibarnü ashiba agi, Israel-i arrtsü adena amaker aser yashi arrtsü anasa Reuters osangbener ka tepsetba den tangar trok yirutsüogo.

Honibar anepdang Israel sepaitemi ashiba agi, parnoki Lebanon nung arrtsü adentsü meranga aliba kiralongrarter

aika tepsetogo.

Hombarnü Hezbollah-i ashiba agi, Israel nungertem parnok züingsem asem tepsetogo.

Maneni New York yimti nung Palestine nunger pusema nisung miyirejang aikati longkak aitogo aser parnoki Israel-i Gaza Strip amakba indang metetdaksü.

Hokolbarnü yimti kübok tesem balala nung nüburtem aikati Palestine nem nüjiso agüjang ta yimyim ayimba den Israel-i ozüing alema Palestine nunger ali atsüingba anentsü khanga longkak aita liasü.

Times Square nung block aika longka aitertemi atsünger liasü. Longka aitertem ya timba lanurtem liasü saka nisung taintem karbo nguogo. Parnoki Palestine wako bener mesüra keffiyehs semer longka aita liasü.

Longka aitertemi "From the river to the sea, Palestine will be free" ta ya yimyim ayima senzüa liasü.

Video ka ajanga Brooklyn nung Hokolbar aonung Democratic Senator Chuck Schumer'er kima nüburtemi ceasefire ka asoshi khanga longkak aitba nguogo, shiba Israel-i aotsü renema liasü.

Maneni New York yimti nung Israel pusemertemia yimtung süa süzüba nguogo aser mapang kar nungbo Palestine nunger pusemertem den o langtepa nguogo.

Longkak aitba sentong yimjung nung dang tembang ajüsüaka anogo tepeyong nung nisung karbo pua liasü.



Palestine nunger pusemertemia Gaza Strip nung Israel nunger sepaitem inyakyim tembangtsü khanga London nung longkak aitba noksa nung angur.

North Korea-i Russia dangi military hadirtem yoker: US

Washington, Mongputeni/ October 14 (Agencies): Ukraine den rara nung amshitsü atema Russia dangi military hadir aika bener yokba atema US nunger ketdangsürtemi North Korea aitsüogo.

Pyongyang-i hopta ishika tsüingda hadir aser injang container 1000 yokogo, ta National Security Council otongdar John Kirby-i ashi.

Ketdangsürtemisa, North Korea kübok Najin nung container 300 bendena yua aliba noksa ka sayaogo.

Military dak sendakba nung tesendaktep atema sensak asemtsü asoshi taoba ita North Korea lenir Kim Jong Un-i Russia semdanga liasü.

Ukraine den rara nung Russia-i artillery shell aser missile aika amshiatokogo aser iba ya melentsü atema parnok den sendaka aliba linük kar den tongtepratepa arudar.

Ken o asadangertem kari ashiba agi, Kim lenisüba kübok North nung prangbong aser injang aika bendena alitsü, ajüsüaka aikabo agütsütsü alirongsen agi anünga lir.

US intelligence agency temi prangbong injang aser hadir balala belenshiba meita aruogo aser ketdangsürtemi ashiba agi

September 7 nungi October 1 nü tashi nung item osettem belenogo.

Hokolbarnü osangbenertem den sensaksema mapang Kirby-i ashiba agi, hadirtem ya rail aser tzüyim ajanga southwestern Russia nung supply depot kati bener ao. Iba tesem ya Ukraine arrtsü nung mile 180 shi pilar Tikhoretsk anasa amenoka lir.

Kirby-i, Kim-i aniba sorkari koba amala hadir aser injang agütsü iba indang osang tejangja magütsü, ajüsüaka US-i taoba mapang Pyongyang dang nungi rocket aser artillery shell tem aliba tema Moscow aitsüogo.

2022 küm February ita nungi Ukraine amak tenzüka sülen US ketdangsürtemi, North Korea-i Russia nem injang agütsür ta shia aruogo.

Pai ashiba agi, North Korea-i item hadir aser injangtem agütsüba ya UN Security Council bangzüng anema lir, anungji onoki iba ken o ya onok den sendaktepa aliba linüktem den UN nung benoktsü.

July ita Russian Defence Minister Sergei Shoigu-i North semdanga Kim den ajurutep shibai Hwasong intercontinental ballistic missile (ICBM) densema weapons system aika sayua liasü.

Christopher Luxon-i New Zealand PM election kokogo



Wellington, Mongputeni/ October 14 (Agencies): Honibarnü election akokba sülen Christopher Luxon taruba New Zealand Ato Kilongser akümtsü.

Liberal sorkari küm trok tashi linük yimsü asüba sülen nüburtemi temelenshi ka asoshi vote agütsüogo

Luxon-i anitsü aliba conservative sorkar koma kümtettsü iba indang osang tejangja memetet kechiyong ballots tem mezüingma lir. Ato Kilonser Chris Hipkins, shibai January ita Ardern melenzüka ita teku ashi yimsüsüogo, pai Honibarnü pa pusemertem dang pai Luxon dangi call süa tetoktepa nungi pa atsüingba metetdaksüogo ta ashi.

Hipkins-i ashiba agi, result ya pai aginüba ama masü.

"Onoki taoba küm trok tsüingda kechi ajangzükogo, iba atema ni nema adanger," ta pai Wellington nung sentong ka agiba mapang pa pusemertem dang ashi.

Mimlai lia Ardern-i January ita Ato Kilonser mapa toktsü aser

lai joko ojang dang inyaktettsü ta ashi. Lai taoba election vote aika agi akok, saka COVID-19 dak sendakba nung tenokdangba tesashi agütsüba aser inflation agi linük rongsenketzüng amokmerenba mapang nüburtemi la mesakloki aküm.

Vote asem nung anasü azüingba sülen Luxon'er National Party-i vote shilem 40 shi kokatokogo. New Zealand indang proportional voting system kübok Luxon-i libertarian ACT Party den alliance ka yanglutsü imlar.

Kasa mapang nung Hipkins-i aniba Labour Party-i vote shilem 25 dak tera agi tema ngur liasü.

Luxon-i middle-income earner tem saru tajemba kümtsütsü aser temzüng ozüing anema inyaksangshirtem anema jenjang tapet agitsü nangzük aser kasa mapang nung Hipkins-i arishi küm 30 tekübok alirtem nem angati dental care agütsütsü aser anosotsü aser süngjanglijang nungi sales tax agintsütsü nangzüka liasü.

Red Scars-i NSF Trophy kokogo



23buba NSF Martyrs' Memorial asayamung nung takoker telok Red Scars Football Club den ketdangsertem külemi tangokba noksa angur.

Kohima, Mongputeni/October 14 (TYO) : Angami Students Union-i ayongzükba 23buba NSF Martyrs Memorial Trophy Red Scars-i kokogo.

Final asaya nung Red Scars-i goal 4-2 agi Liangmai FC koka liasü.

Asaya nung mezüngbuba goal Red scars asoshi minute 23buba nung Yhunshalo Kemp-i penalty ka ajanga idaktsü aser iba sülen Hminghlu-i minute 36buba nung tanabuba goal idaktsü.

Asaya tanabuba shilem nung Liangmai FC nungi asayar Zumzu Punyü-i minute 61buba nung par team atema mezüngbuba goal idaktsü. Iba sülen ano asaya tembangtsü

minute 15 anunga lia Yhunshalo Kemp-isa penalty ka ajanga par team atema tasembuba goal idaktsü.

Liangmai FC nungi defender ka red card chir parnok asayar 10 dang süaka parnoki ano mapang apuloktsür asayaba mapang Winamthiu Ringdi ajanga tanabuba goal idaktsü. Iba sülen ano Horhreinung-i Red pur atema goal pezübuba idakja parnoki asaya akok.

Asaya akokba team nem senpet sen 2.5 lakh den tako marok aser kuli kaket agütsü aser runners up team nem senpet sen 1.5 lakh den kuli kaket agüja liasü.

Semifinals nung tamakok

anguba team ana nem 35,000 aser quarter finalists tem nem 20000 agütsüogo.

Kija sempet agizükertem:

Best goalkeeper- Kevichütuo Kire, United FC Piphema; Best defender- Vikethozo Shots, Red Scars FC; best midfielder- Khiuwangbo Keurinta, New Market FC aser highest goal scorer A. Yhome FC nungi Yoto Lohe aser Red scars nungi Yhunshalo Kemp na nem agütsü. Tenapronglai goal tekuku idaktsü. Parnok ajak nem senpet sen 10000 den kuli kaket agüja liasü.

Player of the tournament (scooty) Liangmai FC nungi asayar Winamthiu Ringdi nem agütsü.

3buba Inter Department Badminton Tournament tembangogo

Kohima, Mongputeni/October 14 (TYO): Inter Department Badminton Club Kohima tawabangba kübok 3buba Inter Department Badminton Tournament (Kohima Edition 2023), Honibarnü Nagaland Legislative Assembly (NLA) Multi Purpose Hall, Kohima nung tembangogo.

Asayamung shibangba sentong nung CEO Okusa Toyota Kohima, Holo Chishi Swu alakteta jaoker liasü.

Asayamung shibangba sentong ya Nokchasashi, NCS

lenisüba nung agia liasü.

Iba asayamung nung Nagaland Police team-i tebur tarep asaya, tarep temeyoktep asaya aser tetsür tarep asaya koka parnok overall champion liasü.

Kasa mapang nung Medical Department tebur tarep asaya aser tetsür tarep asaya nung runner up liasü.

Category balala nung takok angurtem:

Tebur tarep asaya: Champion: WapangTzudir & Asa Chiesotsu- Nagaland Police; Runner- up: Joshua

Kippen & Nungshiakum-Medical

Tetsür tarep asaya: Champion: Seyiekunuo Lohe & Uma Tamang- Nagaland Police; Runner up: Christina & Thejanuo Rutsa- Medical

Tarep temeyoktep asaya: Champion: Lantinmang Lhouvum & Uma Tamang- Nagaland Police; Runner up: Ruokuolhoumou Rame & Digamlak-NLA

Men 50+ category: Champion: Temjen and N. Wati; Runner up: Tali Jamir & Kreho Athili.

Syed Mushtaq Ali Trophy atema Nagaland team sangdongogo



NAGALAND SENIOR MENS TEAM

Dimapur, Mongputeni/October 14 (TYO): Syed Mushtaq Ali Trophy 2023-24 atema Nagaland Cricket Association-i Senior Men's squad sangdongogo

Team nung asayartem:

- Jonathan Rongsen (C)
- Hokaito Zhimomi (VC)
- Imliwati Lemtur
- Nagaho Chishi
- Sedezhalie Rupreo
- Tahmees Rahman
- Moakumzuk Tzudir
- Khrievitso Kense

- Hopongkyu Sangtam
- Joshua Ben Ozukum
- Sepichem Jungnu
- Oren Ngullie
- Sumit Jumar- Guest player
- R S Jaganath Sinivas - Guest player
- Karan Tewatiya - Guest player
- Support staff

- Shatilo Kent- Team Manager
- Muralidhar R- Head Coach
- Arzoo Raj- Asst. coach
- Kechesin Keppen- Asst. coach

- Shyla Alam- S&C coach
- Mowalong Kichu- Physio

Fixture:

- * 16th Oct. 2023: Nagaland vs Madhya Pradesh
- * 17th Oct. 2023: Nagaland vs Tripura
- * 19th Oct. 2023: Nagaland vs Delhi
- * 23rd Oct. 2023: Nagaland vs Karnataka
- * 27th Oct. 2023: Nagaland vs Tamil Nadu
- * Asaya ajak Dehradun nung asayatsü.

Cristiano Ronaldo Forbes' List nung sen timtiba aaba football asayar kümogo

Mongputeni/October 14, 2023 (Agencies): Sen aika alang contract aser sponsorship deal tulutem aika anguba sülen Cristiano Ronaldo taküm Forbes' list nung sen timtiba aaba football asayar kümogo.

Ronaldo sülen tanabuba jenjang nung Lionel Messi lir. Nüngtugu fooball asayar ana yagi taoba küm ter tashi football asaya amokbanger asaya arudar. Tenati Ballon d'Or aser tanga nüngtugu award tem aika nguogo.

Itasen aser sponsorship deal tem dak sendakba nung taküm Ronaldo-i Messi ajatetogo. Forbes-i ashiba agi taoba Real Madrid aser Manchester United striker yagi itasen ajanga USD million 200 aser tanga deal tem ajanga USD million 60 aazükogo.

Iba list nung USD million 135 aazüka Lionel Messi tanabuba jenjang nung lir. Argentina nung asayar yagi itasen ajanga USD million 66 aser deal balala ajanga USD million 70 aazükogo.

Kasa mapang nung USD million 100 dak tema aazükertem rongnung Neymar Jr, Kylian Mbappe aser Karim

Benzema nung densema lir. Premier League nung nüngtugu asayartem rongnung Manchester City striker Erling Haaland aser Liverpool forward Mohammed Salah na trok aser tenetbuba nung lir. Maneni Sadio Mane, Kevin de Bruyne, Harry Kane aser Robert Lewandoski nungeri top 11 abensadaktsür.

Taoba küm Manchester United toktsüba sülen Cristiano Ronaldo-i European football tokja liasü. Qatar World Cup masaya tsüingda Ronaldo-i Piers Morgan den interview ka nung United aitsüba sülen pa club nungi anina liasü. Real Madrid toktsüba sülen pa Juventus-i ao aser iba sülen Manchester United-i ao ajisüaka iba club nung pa temulung süa masayatet. Pa coach Erik ten Hag-i first team nung masayadaktsüi aküm aser ibayongji pa Saudi Arabia nung multi-million-dollar deal ka yanglur ao.

Kasa mapang nung Messi-a Paris Saint-Germain (PSG) nungi Champions League nung junga masayatetba sülen taküm League Soccer (MLS) club Inter Miami-i ogo.

NOA Secy. General-i national games coaching camp semdang



Advisor to Chief Minister aser Nagaland Olympic Association Secretary General Abu Metha-i coaching camp semdangba noksa angur.

Dimapur, Mongputeni/October 14 (TYO): Advisor to Chief Minister aser Nagaland Olympic Association Secretary General Abu Metha-i, taruba National Games atema Pencak Silat Nagaland team indang coaching camp semdanga liasü. National Games ya Goa nung asayatsü.

Coaching camp ya tang Dimapur district nung agidar. Iba camp ya Nagaland Olympic Association tawabangba kübok parnoki senotsü teyari agüja ayongzüka agidar.

Metha-i asayar, coach aser association ketdangsurtem den ajurutepa liasü. Pai, asayartem aser contingent nung züngsemtem dang state nem tenüng tajung bener arutsütsü asoshi takokba tashi tajungtiba asayatsü merangtsü ajungshia liasü.

Paisa, team dang parnok ya asayartem dang masü saka

Nagaland uniform asümiba sülen Naga nung aser Nagaland tenüng nung asayartem aser ambassador tem lir ta angatetsüla ta ashi.

Maneni pai, Pencak Silat asaya ajungketsü asoshi coach tem aser association ketdangsurtemi shilem tajung agiba atema parnok nem tenüngsang agüja liasü. Metha-i, parnok dang meranga training agitsü, rangloker asayatsü aser nükjidong dak rangloker inyaksangshia medal angutsü aser Nagaland nema dangdaktsütsü ajungshia liasü.

Pai, iba asayamung nung asayartem kanga junga shilem agitsü imla ataba lemsatepa liasü.

Taoba mapang pai Chumukedima district nung National Games atema coaching camp nung shilemagia aliba Nagaland Sepaktakraw team den ajurutepa sensaksema liasü.

BILEMDANGANG

"Mapa tajung inyaktsü asoshi anogoshia ya maongka tajung lir."